

आकाशवाणीखबरां

1. प्रधानमंत्री नरेंद्र मोदी होरें 2026-27 आहले बजट कोहला पैहले दे सलाह सूत्र गितै अज्ज नीति आयोग दी बैठकै च प्रमुख अर्थ शास्त्रिणं कन्नै सलाह-सूत्र कीता।
2. प्रधानमंत्री मोदी होरें आखेआ ऐ कि 2025 गी भारत लेई सुधारें आहले ब'रे दे रूपै च चेत्ता कीता जाहंग
3. केंद्री गृह मंत्री अमित शाह होरें आखेआ ऐ जे तृणमूल कांग्रेस दी सरकारै बांग्लादेश गी बर्बाद करियै रक्खी दित्ता ऐ कीजे एह सरकार घुसपैठ दी समस्या दा नबेड़ा करने च पूरी चाल्ली नाकाम रेही ऐ।
4. केंद्री राई-बाई मंत्री शिवराज सिंह चौहान होरें आखेआ ऐ जे विकसित भारत जी राम जी कनून नै मनरेगा दिऐं सारिएं कमिएं खामिएं गी दूर करने दा कम्म कीता ऐ।
5. बंगलादेश दी साबका प्रधानमंत्री ते बंगलादेश नेशनलिस्ट पार्टी दी अध्यक्ष खालिदा जिया हुंदा काल होई गेआ ऐ, प्रधानमंत्री नरेंद्र मोदी होरें उंदी मौती पर दुःख प्रगट कीता ऐ।
6. भारत नै रूस दे राष्ट्रपति हुंदे घरै पर यूक्रेन आसेआ कीते गेदे हमले दिऐं खबरें पर चिंता प्रगट कीती ऐ, यूक्रेन नै इनें खबरें दा खंडन कीता ऐ।
7. उत्तर भारत दे केई हिस्सें च घनी धुंध कारण आम जी जीवन प्रभावत, रेल ते ब्हाई सेवाएं पर बी असरा।

&lt;&gt;&lt;&gt;&lt;&gt;&lt;&gt;&lt;&gt;

PM Economists

प्रधानमंत्री नरेंद्र मोदी होरें अज्ज नीति आयोग दी बैठक दी अध्यक्षता करदे होई केंद्री बजट 2026-27 कोला पैहले सुझाएं लेई प्रमुख अर्थ शास्त्रिणं ते बक्ख-बक्ख क्षेत्रें दे माहिरें कन्नै गल्लबात कीती। एह बैठक देसै दी आर्थिक स्थिति ते भविष्य दिऐं प्राथमिकताएं दे बारे च सोच-विचार ते उंदा आंकलन सांझा करने दा जरिया बनग। बैठका च उनें क्षेत्रें दे बारे च प्रमुखता कन्नै विचार बटांदरा कीता गेआ जिंदे च अर्थ बवस्था गी मजबूती ते रफ्तार देने ते औने आह्लिएं चुनौतिएं दे नबेड़े लेई सुधार जरूरी ऐ। नीति आयोग आसेआ आयोजित इस गल्लबात कन्नै आर्थिक आयोजनें दे अगले गेड़ दी तयार लेई सरकार गी मते कारी दे सुझा हासल होई सकडन।

&lt;&gt;&lt;&gt;&lt;&gt;&lt;&gt;&lt;&gt;

PM-Reforms

प्रधानमंत्री नरेंद्र मोदी होरें आखेआ ऐ कि भारत सुधार एक्सप्रेस पर सोआर होई गेदा ऐ ते पूरी दुनिया लेई इक आकर्षण दा केंद्र बनदा जा करदा ऐ। सोशल मीडिया पर इक लेख सांझा करदे होई मोदी होरें आखेआ कि अज्ज पूरी दुनिया बड़ी आसें-मेदें कन्नै भारत आहली बक्खी दिक्खा करदी ऐ ते अगड़ी पीढ़ी दे सुधारें कन्नै फगड़ी दी रफ्तार दी सराहना करै करदी ऐ। मोदी होरें आखेआ जे 2025 गी भारत लेई सुधारें आहले ब'रे दे रूपै च चेत्ता कीता जाहंग कीजे इस ब'रे दरान बक्ख-बक्ख क्षेत्रें च महत्वपूर्ण सुधार कीते गे न जिंदे राएं आंदे गेदे सकारात्मक बदलावें दी मदद कन्नै भारत दी विकास यात्रा गी इक नमी रफ्तार हासल होई ऐ। उनें आखेआ जे सरकारै संस्थाएं गी आधुनिक बनाया ऐ ते शासन गी सखल्ला सैहल ते सुगम जेहदे नै पूरे-पराते विकास लेई बत्त पदरी होई गेई ऐ।

&lt;&gt;&lt;&gt;&lt;&gt;&lt;&gt;&lt;&gt;

2025-Watershed Yatra

ब'रा 2025 भारत दी विकास यात्रा च इक महत्वपूर्ण ध्याऽ रेआ ऐ। इस ब'रे केई नीतियें गी हकीकी रूप दित्ता गेआ। अज्ज अपनी बशेश श्रृंखला सुधारें दे ब'रें च अस तुंदे आस्तै लेइयै आए आं जे किस चाल्ली भारत नै खेड्डें दे क्षेत्र च नमियां उंचाइयां हासल कीतियां ना। प्रधानमंत्री नरेंद्र मोदी होरें 2025 च लाल किले थमां सुतंत्रता दिवस दे मौके पर अपने संबोधन च मुलखै दी बदलदी सोच गी उजागर कीता हा। उनें आखेआ जे इक समां हा, जिल्लै माता-पिता बच्चें गी खेड्डनें थमां रोकदे हे, पर हून उ'नेंगी खुशी हुंदी ऐ जिसलै उन्दे बच्चे खेड्डें च दिलचस्पी लेंदे ना। उनें इस तब्दीली गी इक अच्छी शुरूआत आखेआ। 2025 भारती खेड्डें लेई इक ऐतिहासिक ब'रा साबत होआ ऐ। इक ऐसा ब'रा जेहदे च भारती खडारियें अंतरराष्ट्री मंच पर छड़े तगमे गै हासल नेई कीते, सगुआं दुनिया भरै च इक नूठी छाप छोड़ी ऐ। इन्ना गै नेई खेड्डें गी लेइयै लोकें दे बचार बी हून बदली गे ना।

&lt;&gt;&lt;&gt;&lt;&gt;&lt;&gt;&lt;&gt;

## HM Corruption

केंद्री गृह मंत्री अमित शाह होरें तृणमूल कांग्रेस दी सरकार पर राज्य च फैले दे भ्रष्टाचार ते बड़े माड़े प्रशासन दे कारण पच्छिम बंगाल गी बर्बाद करने दा आरोप लाया ऐ। अज्ज कोलकाता च उनें तृणमूल कांग्रेस पर सुरक्षा दे मुद्दे पर नकाम रौहने दा आरोप लाया ते आखेआ जे पच्छिम बंगाल दी मुख्यमंत्री ममता बनर्जी घुसपैठ दी समस्या दा नबेड़ा करने च बी पूरी चाल्ली नाकाम रेइयां ना। गृह मंत्री होरें आखेआ कि बीजेपी अगले बरे होने आहले पच्छिम बंगाल विधानसभा चुनांऽ च दो तिहाई बहुमत हासल करियै सरकार बनाग। अमित शाह होरें अगे आखेआ कि 2019 दे लोकसभा चुनाएं च बीजेपी गी 41 प्रतिशत वोट ते 18 सीटां थोइयां हियां, 2021 दे विधानसभा चुनाएं च पार्टी गी 38 प्रतिशत वोटें कन्नै 77 सीटां थोइयां। गृह मंत्री होरें आखेआ जे 2016 दे चुनांऽ च 3 सीटां जित्ते आहली पार्टी नै 5एं बरें च 77 सीटां हासल करी लैतियां। शाह होरें आखेआ जे अगला चुनांऽ पच्छिम बंगाल च घुसपैठ रोकने ते घुसपैठिए गी बाहर कडुने दे मुद्दे पर लड़ेआ जाह्ग। उनें गलाया जे बंगालसीमा परा होआ'रदी घुसपैठ राष्ट्री सुरक्षा दा मुद्दा ऐ जिसी हल्के च नेई लैता जाई सकदा।

<><><><><><>

## Shivraj G Ram G

राई-बाई ते करसान कल्याण मंत्री शिवराज सिंह चौहान होरें आखेआ ऐ कि संसद नै मजूदा जरूरतें गी ध्यानै च रखदे होई ते कन्नै एम जी नरेगा दिएं कमिएं खामिएं गी दूर करने लेई विकसित भारत जी राम जी बिल पास कीता गेआ ऐ। अज्ज भोपाल च इक संवाददाता सम्मेलन गी संबोधित करदे होई उनें मनरेगा दा नां बदलने पर बरोधी धड़ें दे आरोपें पर उनें आखेआ कि जिसलै विपक्ष दी हकूमत ही तां रोजगार योजनाएं दे कई बारी ना बदले गे हे उसलै असें कदें कोई फितना खड़ा नेई कीता। शिवराज सिंह चौहान होरें आखेआ कि विकसित भारत जी राम जी योजना गी होर मता असरदार बनाने लेई इसी प्रधानमंत्री हुंदी गति शक्ति पैहल कन्नै जोड़ेआ गेआ ऐ। उनें दस्सेआ जे इस मिशन नै बेरोजगारी भत्ते लेइ, प्रावधान साफ तौरा पर शामिल कीता गेदा ऐ ते कन्नै जरूरी माली बवस्था यकीनी बनाई गेई ऐ। बरोधी धड़ें दी नुख्ताचीनी करदे होई मंत्री होरें आखेआ कि इस विधेयक पर 8 घंटे कोला मते समें तोड़ी संसद च बैहस होई पर विपक्ष नै छड़ी डंड रौली पाई, चर्चा दरान नियमें दी लोआंगना कीती गेई, होर ते होर बैहस दरान विपक्ष दे नेता बी लोकसभा च गैर हाजर रेह। उनें आखेआ कि पंजाब सरकार आसेआ विकसित भारत जी राम जी दे खलाफ आंदा जा'रदा प्रस्ताव देश दे संघीय ढांचे दे खलाफ ऐ।

<><><><><><>

## Ex Bangla PM Dies

बांगलादेश दी साबका प्रधानमंत्री ते बांगलादेश नैशनलिस्ट पार्टी BNP दी अध्यक्ष खालिदा जिया हुं'दा ढाका दे इक अस्पताल च काल होई गया ऐ। ओह 80 बरे दियां हियां। सोशल मीडिया दी इक पोस्ट च BNP नै एह जानकारी दिती। BNP दे मीडिया कक्ष नै दस्सेया जे इक निजी अस्पताल च इलाज दौरान खालिदा जिया हुं'दा काल होआ। खालिदा जिया बांगलादेश दी 2 बारी प्रधानमंत्री रेइयां।

<><><><><><>

## PM-Condolence

प्रधानमंत्री नरेंद्र मोदी होरें बांगलादेश दी साबका प्रधानमंत्री बीएनबी अध्यक्षता बेगम खालिदा जियां हुंदे काल पर अफसोस जाहिर कीता ऐ। इक सोशल मीडिया पोस्ट च मोदी होरें आखेआ जे बांगलादेश दी पहली महिला प्रधानमंत्री होने दे नाते, बांगलादेश दे विकास ते भारत बांगलादेश सरबंधें च गूड़ापन आहनने च उन्दे योगदान गी म्हेशां चेता रखेआ जाह्ग।

<><><><><><>

## PM-Netaji

प्रधानमंत्री नरेंद्र मोदी होरें अज्ज नेता जी सुभाष चंद्र बोस होरें'गी आजादी दी लड़ाई दरान दित्ते गेदे योगदान लेई चेत्ता कीता। इक सोशल मीडिया पोस्ट च मोदी होरें आखेआ जे 30 दिसंबर 1943 गी नेता जी होरें बेमिसाल दलेरी कन्नै पोट ब्लेयर च तिरंगा झंडा फहराया हा। प्रधानमंत्री होरें आखेआ जे इतिहास दा एह पल मुख्य गी चेता दोआंदा ऐ जे आजादी छड़भू आसें-मेदें कन्नै गै हासल नेई होंदी, सगुआं एह ताबत, मेहनत, न्याय ते सांझे संकल्प कन्नै हासल होंदी ऐ।

<><><><><><>

## Bus Accident Uttarakhand

उत्तराखंड दे अलमोड़ा जिले दे विनायक थाहर पर होए ददी इक बस दुर्घटना च 7 लोकें दी मौत होई गई ऐ। राज्य आपदा प्रतिक्रिया बल दे मताबक बस भिकीयासाई थमां रामनगर जा'रदी ही ते ओहदे पर 17-18 लोक सवार हे। घायलें दा इलाज सरकारी अस्पताल, भिकीयासाई च चला'रदा ऐ। दुर्घटना दे मगरा प्रशासन ते बचाव दल तुरत उस थाहर पर पुज्जे। बचाव कम्म अजें बी जारी ऐ।

<><><><><><>

## JK Security

जम्मू-कश्मीर च नमें ब'रे दे ते होरनें जश्न-समारोहें गी ध्यानै च रखदे होई अंतराष्ट्रीय बन्ने ते नियंत्रण रेखा पर बी हाई-अलर्ट जारी करी दिता गेदा ऐ तां जे बन्ने पारा कुसै चाल्ली दी बिघ्न पाने दी कोशश गी नाकाम कीता जाई सकै। कठुआ- साम्बा- अखनूर- गुरेज- उड़ी- करनाह ते टंगधार सैक्टरें च चेचे तौरा पर सुरक्षा बंदोबस्त निगगर करदे होई दिन-रात गश्त- डिजीटल सरिस्ते राए निगरानी- आधुनिक तारबंदी ड्रोन ते रोबोट उपकरणें दी मदद कन्नै सारे इलाके च हर नकलोहरकत पर नेइमी तक्क रखी जा रदी ऐ ते बन्ने पारा घुसपैठ दी कुसे बी कोशश गी नाकाम करने लेई उत्थे तनात बल पूरी चाली तयार न।

<><><><><><>

## Pilgrims Rush

नमें ब'रे शा पैहले ज्हारां बद्धे श्रद्धालु रियासी च त्रिकुटा प्हाड़ियें च स्थित श्री माता वैष्णो देवी हुं'दी पवित्तर गुफा च मत्था टेकने आस्तै पुज्जा करदे न। सर्द ब्हाएं ते बदलदे मौसम दे बावजूद गर्म टल्लें च लपटोए दे मते सारे श्रद्धालू कटरा आधार शिविर थमां पैदल यात्रा करा रदे न। हर रोज औने आहलें यात्रुएं दी आमद 20 ज्हार शा 26 ज्हार दे बिच्च दर्ज कीती जा'रदी ऐ- जेहड़ी नमें ब'रें दी आमद आहली भीड़ गी दर्शादी ऐ ते एह गिनतरी 70 ज्हार तोड़ी पुज्जने दी मेद ऐ। अधिकारियें आसेया यात्रा गी बवस्थित बनाने आस्तै सुरक्षा- भीड़ प्रबंधन ते ट्रांसपोर्ट सने इंतजामें गी होर निगगर करी दिता गया ऐ। श्रद्धालुएं गी गुजारिश कीती गई ऐ जे ओह दिशा-निर्देशों दी पालमा करन ते उपलब्ध स्थूलतें दा इस्तेमाल करियै तीर्थ-यात्रा दा परेशानी बिजन अनुभव हासल करन।

<><><><><><>